



## Terenga 2: Hōtaka 48 – Me uua ka...

Kei ngā ringaringa me ngā waewae o tā tātou kaupapa, whakapiri mai, whakatata mai ki a AKO. Koinei te pūtahitanga o ngā manako kia ora ai te reo Māori ki tua o ake, ake.

### Hei Mahi Whakarongo

Kua whakaritea tētehi kaupapa whakawhānui i te mōhiotanga o te ākongā ki te reo me ngā tikanga Māori ki te maunga. Kei Te Wānanga o Aotearoa te kaupapa nei, e kīia nei ko Te Pīnakitanga ki te Reo Kairangi. Anei ngā pātai hei whakautu mā koutou.

1. He aha ngā taumata e toru ka kōrerohia e te kaiako?
2. He aha ngā whāinga o te tohu rā?
3. He aha ngā āhuatanga uua?

### He Whakamārama

Ko te whakatakotoranga o tēnei rā e tohu ana i te uua o te kitea, o te rangona rānei o tētehi āhuatanga. Tirohia ngā tauria e whai ake nei me ngā whakapākehātanga i te taha:

Me uua ka kitea te takahē i Te Ika a Māui. *It's difficult to see a takahē in the North Island.*

Me uua ka rangona tētehi reo tōiri pērā i tō Kiri. *A soprano voice like Kiri's is rare.*

Me uua ka whakaaetia e te hunga rā kia uiuitia rātou. *It's unlikely that they'll agree to be interviewed.*

### Hei Manatu

Kei te kaha te puta o te kupu 'panekiretanga' i runga i te pouaka whakaata hei whakamārama i te ekenga o tētehi tangata ki tētehi taumata, hākinakina mai, mātauranga mai, he aha atu rānei.

Ehara i te mea ka taea noatia te whakawhiti tēnei kupu ki horopaki kē atu.

I whiriwhirihia te kupu 'Panekiretanga' hei whakanui i Te Tokotoru a Paewhiti, nā rātou te kaupapa o Te Panekiretanga o Te Reo i whakaara. Kei tōna tau tuawhiti e rere ana i tēnei wā nō reira kua mārō te haere.

Ko 'Panekire' tētehi maunga kei te rohe o Tūhoe. Nā konā i tīkina atu ai te ingoa o te maunga hei kupu whakarite mō te ekenga o te tangata ki tētehi anō taumata o te reo.

Kāti, kei te putaputa hoki ētehi atu ingoa maunga hei whakakapi i tēnei whakaaro. Ko te 'Hikurangitanga' o te reo tēnā, ko te 'Maungatautaritanga' o te reo tēnā. Ko hea tō maunga hei piki māu, e eke ai te taumata o tōu reo ki tō kui mā, ki tō koro mā?

### Hei Mahi

Whakatikahia te takoto o ngā kupu i roto i ēnei rerenga nanu:

1. Taupō ana e te ka Me i rere kōtuku kitea uua
2. o uua rangona mita Tūwharetoa Me ka te rerekē
3. awatea Me te uua i ka kiwi kitea te

### Whakautu:

1. Me uua ka kitea te kōtuku e rere ana i Taupō.
2. Me uua ka rangona te mita rerekē o Tūwharetoa.
3. Me uua ka kitea te kiwi i te awatea